



青陽先生忠節附錄卷之二

四言古詩

習韶尚鏞永豐人兵部員外

天地闔闢禮義攸樞渾淪粹質惟賢是居  
 令德斯隅豹文蔚蔚變于天衢靡靡元綱群生胥溺  
 無津不波無土不赤維皇錫命公捍其陲鉄鉞來臨  
 舒城翼翼天地遄墜寸草莫支群兇四曼天戈夜揮  
 孤城失援天地為悲公死得死公生奚為荷與我  
 皇念公糾糾錫士延禧作祠江阜春秋有嚴嚴牲醴  
 酒冠服巍巍壽公不朽

五言古風



王紳神緡金華人

昔在元祚去四海遭亂離群雄互驅逐戎馬縱橫馳  
降城敗國者比比忘怛怛坐令疆宇蹙一旦山河隳  
桓桓忠宣公耿耿匡濟資蚤負經綸且晚鎮舒江湄  
七年握兵符裒集多義師控禦旣云備撫輯亦已綏  
柰何江漢間妖氛障陰霾豺狼十八萬震吼奔鯨鯢  
衆寡竟莫敵孤城遂難支鞠躬謝蒼旻臣死分所宜  
但恨敵未殄生民墊塗泥闔門蹈白刃子女尸纍纍  
公死曾未久國事日已非  
大明啓泰運海宇臻雍熙旌書下  
九重褒寵不少遲忠精貫日月姓字簡編畱人生孰

不死公死耿餘輝舟來自西蜀拜趨謁新祠徘徊訪  
遺胤髮髯瞻容儀庭下草委靡庭前水連漪想像隔  
千古忍讀墮淚碑酌以椒桂漿悼以忠節詩願起巡  
與遠與公相追隨

郭奎

子章淮西人

維舟大江游攬涕登茲城哲人不復見黃鳥悲且鳴  
高山尚巖巖梁木何其傾名公夙有誓慷慨存遺銘  
死當為厲鬼生當殄長鯨應敵旣神武百戰縱以橫  
精誠貫白日天子無援兵歲久矢石竭捐軀全令名

李庸

德庸鄂渚人懷寧教諭

妖氛起蝸角頃刻迷中州奎壁慘無光終夜輝旄頭

肘腋多反側心腹翻為仇哲人奮忠義誓挽銀河流  
上清帝闕塵下洗蒼生憂胡為國步艱牽制不自由  
六年守孤城麩戰無時休文韜盡奇計武畧皆良籌  
令嚴肅貔虎月冷江天秋飲食不暇給蟻蝨生兜鍪  
妻孥有死心不抱偷生羞大夫誓許國視死輕浮漚  
慷慨一長劍巡遠同遨遊孤墳倚高岡祀事益孔脩  
生順死既安萬古洪名留嗟嗟愛身者顏汗將焉求  
為君歌此曲兩淚濕雙眸

吳臯舜舉元臨江路教授

大節不可奪斯為儒者儔君侯守藩屏遺蹤希德周  
龍舒控淮浙勢比衿與喉環疆擁兇逆孤障截橫流

連帥比開闢忠良孰與侔坐念王綱頽君子懷百憂  
永矢盡臣節秉心欲宣猷講堂華扁新盛氣憎豪酋  
雄文勒堅珉光燄貫斗牛斯人已千載斯堂屹千秋

陳仲完

閩人左贊善

七載守舒城英毅凜冰雪城孤勢援窮全家死忠節  
悠哉同安途可駕睢陽轍昭昭太史書萬古垂不滅

程佑汝佐建安人

峩峩忠宣祠屹立龍舒溪青陽問世才忠節誰能似  
當其板蕩時四面鋒塵起獨力守孤城群敵徒睥睨  
身經百戰餘凜凜能罷士馳驅七載問四望多堅壘  
餽餉道益絕曷由奮弓矢上書思援兵豈料無知己

可憐一片心耿若冰壺水城陷未足嗟從容戮妻子  
一門節義全昭昭無愧耻淡烟荒草平古廟斜陽裏  
慷慨渺遐思巡遠同媿美臨風薦蘋蘩追悼情曷已  
竹帛垂芳名公死猶不死

梁闕 用竹會稽人淮安訓導

世人孰不死死死義心所安苟非明至理捐軀誠獨難  
偉哉青陽公忠義為膽肝伊昔奉朝命宣慰淮西藩  
遭世方板蕩荆襄肆克殘公時在安慶寧忍視民患  
率衆力拒敵奮怒髮衝冠抗節守孤城援絕糧饋殫  
勢迫不獲已慷慨就清瀾妻孥亦同逝耻受汚辱干  
我昨聞其風慨然發長歎丈夫有如此何愧于兩間

遠繼張許流千載名不刊

羅彥美 孝偉廬陵人安慶訓導

武威函國公忠誠貫日月萬古天地間清風凜高節  
當其鎮孤城彼皖豈彈黑四郊多賊壘烽火連阡陌  
公獨提民兵揮戈摧峩壁江淮賴保障天子親受鉞  
抗賊七餘年心雄萬夫敵王師隔天涯地窖無羶噉  
一朝力不支騎鯨訴天闕全家樂捐生願以國耻雪  
大明昭至治褒寵靡遺德廟祀享春秋勲庸勒金石  
緬懷公初年讀書青陽僻鰲頭第一人廟廊判軍國  
旣文亦旣武有典宜有則安知巡與遠而不為公惜  
顏甲李氏陵如何無愧色文章鏗宮商慷慨風騷格

若非張仲綱幾不墮塵跡攬涕讀遺篇躑躅增歎息  
後來姦回輩覽此宜深惕

謝王利貞江右人武陵知縣

元室昔橫潰狂風吹地昏鯨波漲溟滢山岳盡崩奔  
文物委榛棘沙塵蔽中原哲人丁頽運忠憤激層雲  
壯志揮義旗賈勇奮孤軍援絕烽火斷戰酣落日曛  
誓令與賊滅豈獨事功勲呼天向北闕白日慘光晶  
妻孥先決絕死節萃一門至今同安水嗚咽為忠魂  
我來訪古跡周覽對通津焚香拜遺像生氣儼猶存  
古木引危堞猶疑旌旆屯千年有常祀  
聖代錫深恩睢陽共貞烈千載照乾坤

萬白

孟素豫章人武畧將軍

汝漢駭龍戰九野紛殺戮貴游遺組冕鋤耨染肥沃  
舒城駐江介使君總符竹鯨鯢集漢沔山忽沉陸  
傳聞英偉姿死蹈睢陽躅至今淮海人秋春酌泉菊  
佳章魏晉規高風邈難續

劉季篔

會稽人刑部侍郎

荆襄翳氛侵赤子羅物殘孤城逾七載北望阻河關  
無由哭春庭徒然殛賀蘭大事已至此處之良為難  
丈夫既許國節義重丘山墮身既不惜偷生亦何顏  
鬱鬱抱孤憤攄忠激輿情枕戈待明日蚤夜心靡寧  
浩浩江漢間予戟森縱橫疲兵禦勅寇旬服為長城

矢殫仗節死遺恨安可平滔滔東流水猶聞嗚咽聲  
睢陽昔遘患抗節聞張巡智力固有盡孤忠良獨存  
余公值板蕩城守惟孤軍區區仗忠義而乃成奇勲  
殺身諒非易所貴酬主恩大節旣已立成敗奚足論  
有生旣不重捐生獨奚為所以烈士心耿耿恒自持  
忠宣千載人凜凜英雄姿精誠貫日月一死終不移  
淡烟沒衰草寒鴉集空祠悲歌吊忠魂涕下如綆縻

胡廣 光大廬陵人學士

征艦泊脩階前登皖城隅曠懷浩無際吊古重踟躕  
偉哉青陽公文武足憲謨捨攘奠南服勁氣空萬夫  
百戰撫創殘六載枕戈爰四郊轉多壘三復徒上書

吁窮援兵絕力竭形勢孤天步挽不回已矣夫何如  
慷慨盡一決取義以捐軀全家萃忠節一死矢不渝  
精誠懸景曜赫赫凌蒼虛綱常振奔蕩靡波障階趨  
褒揚炫汗竹廟食悠龍舒大江逝滔滔令名胥與俱  
祇肅拜英爽靈颺颺斯須淒涼西日下慘淡寒鷓呼  
企矚仰餘烈攬涕成長吁媿羨巡與遠千古同馳驅

王直 行儉西昌人脩撰

步出北城門悲風動荒榛哲人不可見慷慨傷心神  
伊昔遭屯難江介飛埃塵仗劍誓許國豈復顧一身  
皇天亦可違有志不克伸偷生非所欲殺身以成仁  
令名垂不朽千載同悲辛

美全城詩

劉永之 仲脩臨江人

朝吟都獲曲暮誦從軍篇詠歌何慷慨為多忠憤言  
明公任藩屏仗鉞鎮淮壖孤城當千里百戰定三邊  
斬馘馮大旗吹笳動前軒虎落布平野魚麗度高原  
桓桓熊羆士捷奏日喧傳鼠狐方喚侶耕牧被東阡  
事業冠終古勲名何赫然而我負奇志早歲重周旋  
何當吐寸畫撫劍臨風前捐軀赴國難度用慍煩悵

哀全節詩

淮壖古重鎮龍舒實雄冠顯顯青陽公銜命茲屏翰  
文能宣皇風武能折兇悍仁能撫士卒知能輯流散  
孤城抗千里一身當敵萬運否拙壯圖時屯負英筭  
城亡遂捐軀仗節死國難忠義凜霜日毅名炳星漢  
我來當夏秋延覽遂具嘆俯仰成古今具亡猶在眼  
疲人稍歸郭賈舍臨江岸午風舟舫集夜霽燈火亂  
精靈或來往廟食儼容觀生為烈士尊死為姦臣憚  
咄咄吟詩臺千載汚青簡

美全城詩

辛好禮

大江渺千里荆楚奔為墟淮海既振蕩孤衝當四驅  
雄標九江滋威薄三英區江左俯洪流東南倚輔車  
晨旌耀雲日素鷁麗城隅問之此邦人實猶我大夫  
王師自無敵仁者桓有餘登高望八荒北顧見潛舒  
有桑沃已落雨雪紛在途施施荷戈士穫稻滿菑畝



征人豈不懷國士甘捐軀安得黃鵠羽寄聲達我都

林弼元凱古閩人登州知府

連山亘城西長江走城東岡阜紛起伏波濤爭怒雄  
汎覽古舒國太息青陽公一旅餘弊卒七載當兵衝  
狂瀾日以潰砥柱盡朝宗弱矢繼蒿刺急檄通質筒  
謀身貴食肉徇國思匪躬慷慨望西拜烈日明丹衷  
封墓昭

聖德建祠勵臣忠百年等一死千古留清風疇能識

公心願起文山翁

李彥激 新塗人

四海方鼎沸姦回頽紀綱國士奮勇氣慷慨在勤王

節鉞典南郡潛皖况要邦指顧滅寇掠信賞俘叛亡  
殫力行伍間百戰身百創焉知大厦傾力匪一木撐  
如彼父母疾救死必兢兢所冀可一活臣子分義明  
含悽撫將校誓死豈顧生奈何盜日益困之無完城  
舉室赴水死忠魂殞天星至今城池水嗚咽銜悲毅  
偷生僥倖者視此孰重輕睢陽巡遠輩千古與齊名  
我未覩公傳聞知激衷情椒醑致遠醑因之寓其誠

曾煥 希真廬陵人

赫赫烈丈夫聞之神膽驚文章炳翰苑戈戟森舒城  
三千廷內策十萬胸中兵中原鹿初走襄漢狐鼠與  
赤心一披露秉鉞方專征破敵敵莫已戰袍血涵腥

走馬上封事重雲蔽陽精六軍旌不動七載糧無贏  
嗟嗟廣廈頽大木難孤撐時徂銳氣盡胡乃思功成  
拔劍奮自剄顧義焉顧形城中萬家在一門萃忠貞  
山哀草木震水泣波濤鳴富貴不足惜何惟死與生  
到死臣事畢偷生奚為榮宋並文相節唐齊許遠英  
姓字書汗簡千載流芳馨廟貌今在茲取鼎春秋烹  
吊者豈無謂黜陟懸幽明

陳維裕 閩人御史

元室昔云季兵革四方叛郡縣皆割據孤城復何望  
內無數月儲外乏寸兵援有如萬頃波一葉浮巨浪  
時哉不可為勢也難相抗余公真人傑耿耿懷忠亮

思扶社稷危欲固江淮障七載守城中數書達宰相  
柰何計不行賊勢成醞釀舳艫蔽江來戈戟屹相向  
容色不驚動辭氣何慨慷陳師喻大義死戰無相忘  
開門出迎敵整然列兵仗督戰氣俱振被劊力猶強  
累進勢已窮殺身報君上公已為忠臣妻子將焉仰  
慟哭耻偷生不惜身命喪感激同日死眾兵與裨將  
嗚呼宇宙間孰非類人狀忠義本全昇苟得者無算  
况值板蕩秋死國能先倡公學飽六經此理知至當  
所以決死生從容一何壯綱常賴維持忠誠滿穹壤  
張巡事同歸田橫各不讓人生孰無死公也死何恨  
聖代特褒封立祠寵名貺舒城山崔峩舒江水浩蕩

萬古此山川萬古祠公像公名垂不磨公像祠無恙  
我來觀民風節義在咨訪登祠重再拜引領意無限  
落木風色寒夕陽水榭愴興亡未足論忠義良可尚  
把筆播歌詩奸佞重懲創

陳漁紹

閩人御史

高山枕上滌名山蟠大龍巍巍幽國祠凜凜忠義風  
公昔擢第日名聲已颯颯字牧與持憲到虜蘇民痛  
迨來鎮舒郡適值元曆終城壘四郊合敵舟三面攻  
中流屹砥柱欲障狂瀾東訓練瘡痍民盡為貔虎雄  
射蛟斬鯨鯢躍馬凌烟峰七年窮智畧百戰多殊功  
豈徒淮海敵再期頽運隆外援苦斷絕內儲亦虛空

孤城如片雪置在紅爐中力竭繼以死全家俱徇忠  
更有偏裨士感恩多委躬祇今清水塘血染荷花紅  
大節昭白日芳名耀蒼穹幸逢

聖明世追贈光無窮有司潔傳祀應與維陽同我來  
拜遺像企仰猶華嵩題詩相臺上感激摠素衷

七言古風

呂謙

伯益東平人元廣東廉使

古來英雄大丈夫正未遇時如庸愚忽然執政當要  
途霖然沛然澤寰區武威文士身姓余少年失父幼  
而孤慈母鞠育教讀書學成卓為當代儒明經傳道  
誨生徒菽水孝養為親娛一朝擢桂登雲衢聲名籍

籍動帝都翰林法曹膺選除廟堂機務資謨謀親不  
逮養忽云殂哀毀失食瘁而癯終日戚戚懷不舒守  
服閉戶其貧歷百年四海方晏如卒爾盜賊起不虞  
俄傾蔓延偏江湖殺掠城郭為丘墟安慶正當江北  
隅民殷厥土惟膏腴兵燹年年苦供需歷民失業田  
荒蕪公因久處如鄉問民如子事爭來趨哀哉百萬  
將為魚賴公主守為杆驅聖朝重念民炭塗命公為  
師降璽符開屯勸民事耕鋤選拔少壯操鼓桴死者  
有莖生者蘇寒得其衣飢而飽奮然仗鉞行天誅有  
時遇賊如摧枯死其斬馘生敵俘撫安流散歸田廬  
孤城固守七載餘四面莫敢相侵漁群竟日夜相聚

呼近郊壁壘先逃遁乘時憑陵氣轉麓狼貪虎視思  
吞屠柰何援絕糧無儲死戰力拒殞厥軀嗚呼不仁甚  
矣乎父子既沒并妻孥張巡許遠絕代無百世之下  
君與俱朝廷聞之為嗟吁贈官褒寵駭要樞事功赫  
赫傳不誣史官直筆文靡虛故人道夫何勤渠備述  
終始無缺踈我今停筆空調調言不盡意情難攄吞  
轂躑躅淚如珠

張紳士行齊郡人序見七言律

叢林狐嘯楚氛起胡馬不飲長淮水將軍夢斷玉門  
闕死作大龍山下鬼大龍山色撐秋空遺恨不與江  
流東荒城矮屋琵琶語從此無人說呂蒙憶昔將軍

初鎮此十里孤城贅疣耳復業殘民徧地來感恩戰  
士全家死城中日日望太平姦臣南來猶弄兵十年  
血戰孤城死鴈書不到黃龍城旄頭夜墮城門戟十  
五嬌兒向爹泣野塘霜老芙蓉花化作鴛鴦影尤隻  
大明當天四海同  
天子垂拱明光宮旌忠勅賜將軍廟共道豳公勝夏  
公空城八月秋風起衰草黃雲棹孤艤一樽濁酒醉  
江濱白髮門生淚如洗

吳鏞子韶新安人

陰霾夜吞小衡嶽天柱峯摧將星落俄聞赤幟環城  
郭坐見蒼生犯鋒鏑將軍急呼父老言食君祿厚庶  
城專吾將力戰死報國爾輩何計能生全壯士聞言  
皆感泣願附將軍雪中臆大江浪湧風悲鳴白日光  
磨天動色開閔突戰奮莫當熊咆虎躩敢敵強三軍  
命逐鼓聲絕千里血染春風香將軍當代文章伯力  
挽乾坤寸心赤當時閭闔排青雲今日污泥見竒壁  
手書大節思殺身片言効死數萬人嗚呼天下真將  
軍睢陽遺廟同千春

黃至善

清江人常州訓導

元綱解紐江淮沸鹿走中原犬群吠閭閻童豎變而  
異有奭其中赤其熾蟻聚蜂屯勢轉熾大夫領命曷  
奔逝盡心所事天弗貳舒城言言屹中峙封豕長蛇

互吞噬士卒瘡血為吮洗大小戮力奮忠義扶傷救  
死殫劬勤七更寒暑氣弥厲孤城安危生死寄一木  
難支大厦顛城摧堞圯旌旗靡劍鋒拂喉血噴兩鬢  
室甘作忠義鬼繼跡巡遠耿青史兩朝褒錫美封謚  
廟祀綿綿歷年歲覲然愧殺襄陽呂

龔資遠

龍泉野叟

元季如秦失其鹿高材疾足爭先逐群雄犄角心形  
疲蒼黃得失譬蕉覆武威余闕太平時射策親臨白  
玉墀傳聞教子嘗希聖擐甲勤王屢出師旌麾來守  
桐鄉土貫日忠誠猶李黼扶持社稷共安危拊循邊  
同甘苦孤城寇至環三方指揮獲醜飛樓傍呼聲動

地兵威振殺氣經天賊勢猖恨若睚眦無外援奮身  
再累金創戰在生養毋盡中心臨死思君猶北面  
聖皇建極都江東澄清天下斬群雄

詔令立廟褒忠節黎民祭與事親同闔門寧死為忠  
鬼聞將禮葬衣服備國步正逢危急秋死重泰山能  
有幾為公作歌情慘傷酒酣擊節聲遶梁男兒百世  
當留芳嗚呼男兒百世當留芳

鄒濟汝舟

孤城抗賊無援繼七載長淮藉屏蔽白日黯慘氣侵  
殷猷偷磨牙駮駮蹶忠如下壺身殉國誓若中丞死  
為厲英靈竟尔助天兵僕姑一發渠魁殪

周廣原廣

青陽先生誰與同分明仗劍全孤忠丹心耿耿貫白日  
堂上廟食真英雄七年領鎮舒州職獨障江淮若  
塵敵枕戈橫槊志愈堅歛血裹創身不惜長江餉絕  
財饋殫掘鼠羅雀給軍食夕烽不舉絕援音仰頭告  
借蒼天力蒼天不言元祚移天命大運歸皇極嗚呼  
力疲城陷不自專引劍捐軀盡衷赤妻孥取次沉清  
淵豈肯蒼黃受危逼一門忠孝史筆新千古萬古磨  
不得戰骨於今塋江皋塚上年年芳草碧日月屠諸  
秋復春寒食城西吊遺跡東風淡蕩飛紙錢辭客追  
傷淚沾臆清水池塘綠湯湯忠魂列魄情何長社紅

蘅碧幾夕陽子規啼血春茫茫

劉素真白廬陵人編脩

元綱解紐搶攘開四郊多壘生民哀湖襄劇賊陳亥  
諒揭竿斬木崇蒿萊黃塵暗空鶴群淚黑風倒海鯨  
波沸真儒端可佩安危一柱孤梯屹淮滢羽書曉夜  
祈援兵誓不與賊求俱生

皇天克求國年祚白日合照臣忠精柰何軍敗鼓鼙  
死仗劍臨營命妻子汝今先我盡捐軀我亦剖肝為  
厲鬼當時列郡非無人含污忍耻羞彝倫青夜山中  
夜光紫先生烈氣開愁雲乃知曆數歸  
真主天錫吾

皇義旌舉九江閉艦清咨區十道先鋒夷醜虜款瞻  
閩闔乘

飛龍怒蛟妖鱷無餘蹤便援公議下表典蒐獵遺靈  
旌死忠同安邵郭脩瑩域特

勅先生長廟食逸編文燄吐晴空千載清名常赫奕  
自是鄉旆叨錦榮艤舟祠下悲前星堂堂古貌鬢如  
戟烈烈英威秋滿城我來引觴薦未已稽首再拜思  
儀煇彩毫題罷倚闌干落木寒鴉叫烟雨

潘訥孟賢青山人

乾綱已隳坤軸折朶頤元鼎奔妖孽戎馬揚塵正騷  
屑舒城閩帥人之傑保障江淮對勳烈挽弓欲射天

狼滅炯炯丹心凜冰雪七載爭雄智力竭援兵不來  
餉道絕萬虍虫群肆傷鬻旌旗偃影城摧堞裹創扶  
疲氣不懾拘軀報國死生決劍華如霜沁碧血闔門  
妻子皆全節雖死猶生名愈潔潛山黯淡江聲咽古  
廟夕陽遺恨切李公點首顏公舌萬古清風與同列  
石宇未熙淮南人山陽訓導

江口風沙虹貫日猥偷三方蜂蝟集裹創百戰誓孤  
忠四望無援攻愈急使君丹衷真可憐讀書六義非  
徒然愛女賢妻何足顧一心保障東南天出師漢表  
魁文苑今誦篇章亦精選淮東老叟為環收要使斯  
文共悠遠君不見能相閣從容堂望江樓宇遙相望



行人吊古每悽惻編簡聯輝百世芳

向寶克中豫章人應天府尹

舒城角鼓吹曉霜天星墮地寒無芒將軍許身死報  
國死作英靈猶殺賊蘭亭寶鑑泣離鴛綵翼竟碎青  
雲端沉珠毀璧真足惜光輝耿耿埋泉閔一門節義  
冠今古月冷鶻啼魂魄苦東風草色碧連天恨血千  
年不成土

張昱光弼廬陵人元浙江行省員外

雙刀悍卒來江閔余侯一死人所難英風千古激頽  
懦大節一旦迴狂瀾只今廟祀遺淮甸几几軒裳凜  
生面我來哀些吊忠魂白日啼烏淚如綫

杜桓宗表金華人辛卯進士

元政陵夷兵四起戎馬紛紛若峰蟻烟塵千里暗中  
州烽火連年照江水青陽先生天下雄擲筆手提莫  
耶鋒平生讀書伏忠義十年領職當兵衝保障江淮  
鎮南服幾回殺賊賊推衄軍士分屯野外耕飢民屢  
賑官中粟孤城日落鳴鼓聲中營風急搖旌旗軟血  
登陴裹創戰許身報國終不移援絕兵孤糧餉竭大  
星前墜國柱折三軍躑躅民悲號江水東流共嗚咽  
乘風騎龍遊帝鄉追逐張許參翱翔忠精炯炯貫霄  
漢萬古白日爭輝光往事淒涼五十載至今生氣凜  
如在有客示我青陽編撫卷令人重悲慨

廖寬

惠陽人府學訓導

聞道胡元初失鹿天下紛紛爭角逐中有奸雄恃井  
蛙結網張羅誇疾足一朝遠獵皖城東公為勅敵當  
前鋒六步七步賊敗去折衝惟在咲談中同安一帶  
公獨守孤軍屢持戟難久身軀雖赴清水塘劍鏃要  
斬渠魁首舉家妻子盡捐生泉下甘同節義名骨肉  
一時皆塵土茫茫堪輿恨不勝

聖代旌能豐祀典廟食千秋忠益顯令譽終教貫古  
今新碑不使封苔解我來和淚吊孤墳古木鴉聲不  
可聞往事令人傷懷抱夕陽荒草空黃昏

儲玉

府學訓導

淮西當日分符節誓與孤城共存滅只將大義鼓三  
軍盜賊頻來頻破折一朝悉衆環相攻力不能支智  
亦竭佩刀自刎沉清塘妻子聞之遂俱絕虜亦後來  
知重公禮歛親令塋高垵

聖皇掃蕩寰宇清褒典輝煌表人傑黃菊離邊萬瓦  
霜青松岩畔三冬雪一家忠義自古無父老至今猶  
解說我來吊古日已暮望中青草猶凝血摩挲兩眼  
讀豐碑砌蛩啾唧增嗚咽

杭淮

宜興人刑部員外

胡俗椎髻亦可耿耿忠義如左丞荆揚賊柵蝟毛  
起慄慄孤城誰足撐手提干戈自血戰六年展轉無

援兵誓不與賊共生死張許獨守睢陽城城陷身危  
世事去天下之勢如土崩嗟哉公妻義不辱亦與諸  
兒同日坑丈夫忠義有如此烈烈上貫陽烏精且聞  
數百猛士死悲歌慷慨思田橫秋深荒臺石漠漠江  
寒落木雲冥冥江流暮激石頭怒遺恨猶存戰伐聲  
嗚呼吾

皇為公殺賊亦足報公今廟食公須平

吊余青陽賊

秦和羅鶴

繫皖城之征舸謁青陽之墓祠悲果仕以殉國托蕪  
詞而吊之粵胡元之末造隳九法與三綱獨匡之以  
正道隨所任而能滅一居州之在宋自降割其奚醫

既以直而見擯正履遜之身期俄四海以鼎沸分靡  
係其安危異符堅於王猛矧時勢之難為何是忽之  
承制遂矢死以駸馳昔季路之死衛雖位猶靡宜  
更靈均之溺湘諉宗國而罔之埒先生於二子應仕  
止之無疑彼三良之殉穆以畏迫於秦康昭至義於  
陳思尚深哀其不當死不難而處難疇先生兮生張  
匪顧命之將相戰敵愾以勤王必救世以自許儻審  
已之行藏昧狂瀾之難遏覲胡運之靈長支一木於  
頽厦終莫拯其危亡泥食焉以死事惑堅冰於履霜  
此所以惜先生之勇果而中道之或傷也嗟乎出處  
由已伊誰能逼出謀既決死皆其職求一節之終始

數十百於千億繫先生之守此樹屏翰於南北陳忠  
義以勵衆徑百戰而愈力冒矢石逾六稔賊環攻而  
靡克逮援絕而力屈率妻孥以死國雖異代之遺氓  
猶恤忠而感德揆壺國之權姦舉先生之巨賊氣凜  
凜以如生與龍山而競色宜血食於茲邦為守臣之  
永式江流兮有遷英風兮罔極諱曰中庸難能兮仕  
止難時宣尼既邈兮斯言已而一節靡渝兮代能幾  
人允矣先生兮胡元忠臣

長短句

劉彥昂

漢之季洪流何湯湯赤子為龍蛇蔓於漢以淮割我

城色圖不祥天子曰嘻予何以奉廟朝群臣登明堂  
曰予近臣御史闕咨尔撫師古舒國闡以外尔制之  
賜尔三百衛士斧與節毋黷民毋宄刑苟附而安文  
武並用禮之經臣闕昧死頓首泣主憂臣辱敢不力  
御史騎馬來萬姓淚落喜且悲子我塗炭民漢官威  
儀今見之東市率牛羊西市羅酒漿紛紛列道左御  
史下馬相扶將諭以天子聖且愛明見萬里外宵旰  
不遑食兵尔飢尔苦顛沛御史雖愚頗知忠與慈惟  
尔患難相扶持鼓尔鼓旗尔旗疾則疾徐則徐壯者  
戰守老者屈俾尔農桑無奪時桑青青麥茫茫牛羊  
走丘墟御史城上行茅屋人家聞讀書以心感人心

敵至輒敗不敢窺城東啼虎豹城西嘯龍蛇黃攻  
始退山越什什伍伍來相圍裹創戰城南叱血戰城  
比大船小船捍江列城中如流魚御史奮臂城上呼  
悲風揚塵沙起白日無光士爭死廩無粟士氣衰朝  
食城上草暮煮城下其癘殃相枕何流離御史斬愛  
馬士卒不忍食日夕援不來矢盡兵殘益危逼烏騎  
死野戰烏鸛銜肉流尸殪孤城坐於瘁土山地道不  
可當御史誠不德握手謝父老尔民多殺傷御史登  
城北面拜稱臣萬死無以報陛下闔室竟與賊俱亡  
楚山蒼蒼楚水洋洋御史之節功烈顯彰天之奎璧  
地之山岳人之綱常千載弗渝日月普光誰能置廟

復立社享於百世及天下

趙濟川

東吳人

余左相身如琛膽如鏡千萬人中一豪傑讀書青年  
舒德業經濟之才邁前哲鰲頭曾占科場魁袞職欲  
補王家闕元綱旣不振四海正騷屑保障江淮禦妖  
孽七年力戰氣弗懾一門効死甘伏節余左相何烈  
烈遺恨難忘國讐雪古舒城下東流水風激鯨波尚  
嗚咽大義炳日星精忠貫璧月土華不蝕美弘血董  
狐直筆青史書地久天長名不滅

徐益 謙受四明人

石可爛海可竭惟有死義臣萬古名不滅余文忠公

志英烈舒城六載持元節身經百戰心未降塵暗三方輜重絕惟公自是真丈夫勢孤力盡將何如嘗殺不受賊奴爵死忠豈惜千金軀既聞捐生得其所妻豈不能作汝忠臣婦賢兒愛女英淑姿玉碎花飛上天訴漢室田橫皆義兵從公將士尤可矜一朝同憤葬魚腹月明浪泣嗚咽聲維揚義士重然諾示我遺篇珠磊落豐功盛烈銘鼎彝圖形尚擬凌烟閣

古哀引

辛好禮大梁人元豐磨

古哀引者為淮西閫帥余公廷心而作也公守安慶以孤軍當三面之衝抗方張之寇者凡七年至正十八年春正月寇大集城下樵餉絕郡遂陷公知民

不知即躍馬返舍戮其妻子已乃自殺予聞公之義慟不自禁乃為古哀引以見意焉公嘗為文名堂題曰大節則其死生不渝之誠以見乎是尤工著易嘗曰吾書成當以金石為櫃藏之名山以俟後之知者駟歸房申返嶽東南一柱折橫流將安托哀哉古舒之國國有城城平淮沃天下清大夫之來難方作以江為城捍江郭天狼墮城南天狗噬城北江流何舒舒虎兕不敢薄哀哉天地何反復大夫騎馬歸闔室化作萋弘碧大節有新堂堂中易有書哀哉大夫民非爾為魚誰使鼠穿我墉龍噬我居哀哉大夫為精衛為湛虛

李景春

時崇芝陽人臨安知縣

為臣當死忠為子宜全孝五常備而三綱明始著剛  
腸丈夫操昔聞元季日擾攘群兇嘯聚爭陸梁攻城  
援地一何速遂使海內隳封疆迭命元戎仗旄鉞可  
憐不肖虧臣節賣降鼠竄圖苟存孰效將軍奮忠烈  
將軍秉心鉄石堅誓不與賊同戴天孤城大小二百  
戰揮戈破賊皆身先屹若中流椎砥柱欲挽天河洗  
寰宇奈何宗社神鼎移一旅難將江漢踐力盡城危  
勢不支鑿山煮弩難周飢四陳章疏妖氛障七年不  
見來王師閔峽兵屯百萬甲紛紛割據惟讎殺一任  
江淮望眼穿排難誰將一騎發將軍含笑掣龍泉從

容就死沉清淵偏裨妻子同時殺大義直壓崑崙巔  
荷我

天皇登九五盡四海外民安堵首領

丹詔表忠臣烈烈高風千萬古嚴祠間氣何稜稜精  
英夜夜輝長庚絕代英雄嗟已矣長江千古空流聲

胡温樂府二章會稽人

參政余公鎮舒六年水陸交戰屢徵援兵不至戊

戌陳友諒入寇城陷公死于清水池作池之水

池之水可雪國耻侯面如生侯心不死

附水軍萬戶紀守忠隨戌安慶楚寇大入力戰不

及馬上刎首而死作雨來

楚雨來漲旁流百戰不屈志未酹手提髑髏示主帥  
此身雖死報國仇

附羅伯輝樂府玉帶光哭道童司徒

玉帶光羅衣紫鍾陵相公臨川死臨川死骨亦枯何  
似莫出鍾陵途鍾陵城頭頭白鳥夜夜為爾啼嗚嗚  
李潯陽余安慶千萬年人欽敬

黃諫

金城人

君不見有宋享國三百年扶危全得儒者力多方養  
士得士用文山壘山一時出又不見胡元遽失中原  
鹿四海豪雄競相逐列郡失守朝廷危全節惟公與  
李芾二公學識邁等倫虎榜擢冠新郎君堂堂大志

不小就說是忠州真鳳麟江淮東南勢披靡鼉鼉肆  
兇沸波水大厦傾頽不可支江州已陷公復死當時  
王公宿將任藩翰坐擁雄師幾千萬良策不過欲偷  
生就縛就降舉無限余公家世出西涼河西閭氣公  
獨當我亦生在黃河許仰企前哲心難忘前年奉使  
過祠下睡聞猿啼清夜

王事勤勞未暫留欲奠椒漿憾無暇茲來拜墓意獨  
虔後謁祠堂江水邊獲見賢孫問家世鄉心切切還  
相憐人謂余公死王事我謂余公今不死

大明當天重倫紀遺像儼然歆血祀死者如公萬萬  
人誰有廟像今猶存自古設科稱得士碌碌偷安奚



足貴

劉淮

羅山人巡按御史

三月三日江上行江滸之麓忠臣瑩忠臣者誰余左  
丞樓亭春潮風樹鳴意昔元衰啓真祚四海霧塞奔  
鯢鯨公昔罷歸青陽山承制宣慰分茲城當時城外  
悉盜柵來從官道推赤誠不謂學古儒飭吏手揮一  
劍當勅爭淮東西踞城半陷烽塵旁午無援兵而公  
誓士捍群敵舒州城廓風中莖屹然江淮一保障扼  
絕諸路奮軍聲鉄椎碎齒斬說客焚書破偽何神明  
漢兵大集壓城破孤軍血戰猶抗衡欲官將軍漢急  
呼戟手大罵敵訇訇吾恨不得汝即手噉之飼物屠

之烹事急引分溺清波忠節所係身毛輕妻子聞之  
競赴井余氏血祀無遺丁誅曰臣死于君妻死于夫  
子死于父忠孝貞節萃一門高風直與乾坤並衆謂  
將軍不負國我於將軍何愛生從之死者餘千人義  
風海內聞者驚君不見晉卞壺齊田橫忠義感激人  
委傾橫五百士壺二子此殆過之吾容評古人養士  
豈徒爾國之元氣從枯榮文忠一死大勢去輿圖從  
此歸

皇明胡元得國百十載終史僅見公之名同安江上  
一杯土望中風烈雲英英再拜墓前斟明水江花江  
草忠予情

謠類

周霆震 亨遠安成人

古今城謠

昆侖烈風撼坤軸日車欽轡咸池浴六龍飲渴呼不  
聞赤蟻玄蜂厭入肉荆襄弗支廬壽孤江東掃地如  
摧枯忠臣當代誰第一七載舒州天下無東南此地  
閔形勝天柱之峯屹千仞當年赤壁走曹瞞天為孫  
吳產公瑾我公千載遙相望崎嶇恒以弱擊強孤城  
大小二百戰食盡北拜天無光當閔拔劍蒼龍吼盡  
室青汚奸黨手摧鋒闔郡無生降群盜言之皆稽首  
堂堂省臺羅公卿建牙分省日募兵哀哉坐視無寸  
策遂使流血西江平向來莫曉皇穹意大將南征死

相繼一時貪暴盡庸材玩寇偷安饕餮富貴河流浩浩  
龍門西燕山萬騎攢霜蹄英雄暴骨心未死去作海  
色催潮鷄玉衣飛舞空中見大息孤忠塵百戰五陵  
元氣待天還睢陽誰讀中丞傳

舒州謠

前元劉參謀

聖朝封域際海隅行車班班通九衢諸州城廢不脩  
築民安耕織無憂虞妖狡行恠惑其徒向來食民被  
脅驅國家少備莫禁止遂使猾夏窺中都大夫仗鉞  
來守舒舒州城小鉄不如城下長江限濠柵周遭守  
備用白夫賊子干城不得踰大夫叱戰人爭趨嚶嚶  
魑魅半就死陰風吹血腥東吳七年孤兵經百戰白

日烟烟忠義俱我民衣食仰官給盡力効死寧睚眦  
王師不援百計踈城中食盡官無儲沔陽健兒肆剽  
殺殺人逮盡終何辜大夫應戰如走珠誓國寧愛千  
金軀寶刀斷折笳暗鳴戰不持鉄至日晡絕咽剥膚  
血賤鬚游魂半空罵賊奴大夫白骨行將枯大夫赤  
心死不渝大夫大節青史書大夫遺像麒麟圖皇天  
后土有終極大夫精靈無時無哀哉我生不能報大  
夫恩死不能報大夫冤但願化作精衛魂年年啣土  
為蓋大夫墳

同安謠

黎昶伯輝清江人

黃雲漲空雪欲飄長江落日生暮潮同安城頭獨運

佇悲風拂髮寒蕭蕭市蓬老翁年七十鶴髮鶉衣道  
傍立倚筇為我說吳亡含憤未言先涕泣前朝值亂  
戍守奔土豪割據何紛紛攻城拜將爭殺戮同安賴  
有余將軍將軍秉心盡忠義訓練民兵久精銳城邊  
握濠深百丈城上嚴更列旗幟朝廷消息久莫通江  
寨群盜矜豪雄樓船萬甲氣如虎戎衣染遍秋江紅  
將軍此時力匡國執銳開闔屢迎敵鉄騎交馳白日  
昏雕戈上指青天拆棧陽門前殺氣高奮身寧辭征  
戰勞江淮黎庶半為鬼僵屍臥骨填空濠同安拒守  
經七歲破圍不見官軍至銅柱難成馬瑗功睢陽竟  
出張巡志一朝群盜登城堙揚旗百里飛紅塵疲兵

果創不能戰計窮豈顧圖全身將軍挺身出帥幕竟  
逐飛星陣前落半夜精靈出戰營千秋廟食依江郭  
聖人一出寰宇寧鳳麟應瑞黃河清當年逃亡命如  
蟻豈期年老逢昇平荆棘連雲戰爭地近來茅屋方  
成市山鳥如呼者舊名江流尚帶英雄淚當年繁華  
何足論聞翁此語傷吟魂樓臺盡隨灰燼滅人物風  
流今幸存樽前感慨應未已宦情總付東流水長歌  
因賦同安謠留與他年入詩史

龍舒謠

晏壁 彥文廬陵人

旄頭芒角昏三階海潮怒湧騰江淮黃河夜奔失故  
道神州陸沉妖霧霾湘漢列城先失守不逞之徒紅

帕首天留忠節在舒州七載堅城古希有余侯胄出  
忠義門一念誓欲清乾坤殺敵未入雲鳥陣勁氣已  
息烟塵昏南征諸將多貪暴抗疏蔽垣三不報凜如  
片雪嚮紅爐安得檄書來遠道五千疲卒百戰餘君  
臣義重輕頭顱妻孥伏節痛切齒士卒冒刃爭捐軀  
臣頭可斷心難死願托精魂為厲鬼遂同烈士李江  
州渠賊殄殲方雪耻太行雪薄河無冰十年鴈不到  
淮城秋風空撼五陵樹天子無意圖中興匣中龍劍  
乘時化英雄力盡嗟凋謝太白蒼蒼北斗垂國殤暴  
骨泉臺夜春深艤棹經淮肥落花芳草啼子規莫後  
故老談吳衰淮山肥水含餘悲

行類

哀歌行

盛景年備齡新昌人

江州在江南舒州在江北楚人輕佻厭承平抵掌吹  
 唇弄鈞戟私鹽船上挿紅旗下江攻城如箭急前年  
 江州李侯死余侯今歲舒州沒敵策俱登龍虎榜尊  
 城不避豺狼窟文章已照汗竹青姓名只與秋虹白  
 當時儒服世所輕一代綱常兩侯立李侯能死亂離  
 初剗地斫開忠義途題詩屋壁雷電走下視白刃能  
 捐軀可憐猶子如玉雪揮之不去亦已殂余侯固守  
 六載餘扞庇江淮功莫逾鄰藩不借睢陽粟問道久  
 絕長安書一朝城壞侯已死妻子賓客同時俱兩賢

相對如壁立江水欲流流不得瞿塘破碎白日昏盤  
 渦無底潛蛟泣江南江北春冥冥忠魂對語百鬼驚  
 汀蘭既芳復欲歇江豚吹浪何時平邊江大船搖四  
 櫓不載私鹽載兒女却厭紛爭無了期夜祭船頭過  
 江去

詞類

沁園春

劉基伯溫括蒼人

士生天地人孰不死死節為難羨英偉竒材世屈淮  
 甸少年登第拜命金盞面折姦貪指揮風雨人道先  
 生鉄肺肝平生事扶危濟困極  
 繼文也使庶懦聞風膽亦實想  
 清名而

抗節誰不辛酸寶劍埋光

入色露

也不乾如公者嘆黃金難鑄白璧誰完

沁園春

唐廣雲

桂林人司業

元綱紐解四郊多壘國步艱難公武畧文韜孤城分  
閫躬擐甲胄心在金盞保障江淮顏波砥柱鉄石心  
腸忠義肝當年志願肅清氛祲汛掃冥頑  
名重若丘山仰凜凜英風六月寒幸遭逢  
石高

聖代加封廟食行人吊古淚墮心酸箬馬奔馳祠林  
霜染猶似征袍血未乾評公德克忠克孝百行皆完

念奴嬌

彭彥克

元衰運去空產余忠宣一代人物亂寇環攻領孤軍

七載守城堅壁萬里皆降孤城獨抗一片紅爐雪闔  
宅捐軀赴難同為豪傑

整頓三綱父子君臣夫婦事一時奮發清水池邊古  
廟中千載香煙不滅景仰遺容想義膽忠肝竦人毛  
髮物是人非贏得清風明月

又天仙子

哀辭

晏璧 彥文廬陵人僉事

元朝以科目取士者四十年而兵起中原一時由進  
士列王官者千餘人能以孤城抗敵係民心而重國  
勢者淮南左丞余公一人耳公名闕字廷心武威人

癸酉進士及第累官至浙東僉憲以劾贓吏忤時相  
退居合肥及盜蔓延朝廷始起公帥淮西分兵鎮舒  
舒故楚地介江淮當水陸要衝尤盜所必攻大槩舒  
之可守者以有合肥為之根抵池陽為之屏翰江西  
為之蔽援已而列郡相繼陷而舒亦危公以大義結  
人心撫以仁守以信平時煦煦相勞苦若父兄詒其  
子弟及發一號令如雷霆如江河必不可回以故盜  
常以十數萬抵舒公部分素定左圖右書談笑如平  
昔民爭踴躍赴之夫征婦餉旄倪奔呼朝夕拒戰至  
弥旬日越歲而不以為勞果創飲血至相枕藉而不  
以為病征輸供億至累巨萬而不以為困自是盜勢

浸衰而舒之封守固矣故環其境自河南北江襄閩  
廣浙蜀其間名藩之所都方伯連帥之所統執法司  
憲之所臨徃徃淪為鬼域鞠為丘墟驛道荆榛行千  
里不見人跡而舒屹然有不可拔之勢使夫民之徇  
義者有所恃而不詭隨之陸梁者有所憚而不敢  
騁是則公之烈豈尋常方面者可比哉惜元運將  
傾一木不能支大厦丞帥抵高郵事垂成以讒廢  
藩垣將帥多苛刻貪侈縱豪惡吏為瓜牙專務深文  
巧詆陷人於非辜使不得及其真藉募兵為名誅求  
寃濫民富者誣與盜通籍其財恣意笞殺人無復按  
宰相又唯視賂厚薄定賞罰賂厚者雖無勞遷就為

之請其無賂功雖上輒抑之故寇至之口吏之濫賞者棄城走未賞者以城降罰之者去為寇公陳其弊於時相賀太平凡四上書俱不報十六年斬寇倪文俊來攻公出戰寇敗走別將胡伯顏敗績小孤山紅巾海天驚數千艘突至城下公出奇兵龍襲之奪其舡斬首千餘級先後受圍凡五十二百餘戰十八年正月七日城遂陷公自剄妻孥子女爭赴水死幼子甫晬棄水濱寇刺之去迨今存舒守韓建舉家被殺淮民登城捐階罵賊求死無一人生降麾下士死者相望知名者得十八人事聞贈公淮南行省平章謚忠宣公天資超邁貌不逾中人文章氣雄健語必

自已出立身廉不殖貨產善待士故人樂于効死予被召過舒慕公節義為楚穀以夢之其辭曰晴陽當空兮陰霾翳之嘉禾秀野兮愆風躓之嗚呼夫子兮不幸際之揚神武以挾之兮覺晦冥之愈深箋天闕以訴之兮何肅殺之難禁竭余力而繼之以死兮不負於此心嗟襄樊之土崩兮感湘漢之川決豐舒之士民兮凜紅爐之片雪羌夫子之執法兮循繩墨而不頗欲人心之固結兮必仁漸而義摩慟兵孤而援絕兮糧糗既匱民間風而嚮義兮鞠躬盡悴譬廣廈之將傾兮非一木之能支猶人命之垂絕兮豈醫藥之可為感天地之閉塞兮淪泥塗於軒寬抑時



運之使然兮乃邁屯而罹蹇既燎原之莫撲兮啼城  
頭之亂鳥苟脫身以圖存兮豈不可以全軀君臣大  
義不可以虧兮忠匡扶夫綱常受民社之重責兮宜  
死守於封疆惟舒民之激烈兮不可以為變而孤城  
危亡兮僅不絕之如線煙霏霏其晝宜兮風蕭蕭而  
揚沙天地為之黯慘兮日月失其光華滓匣中之寶  
劍兮拭腰間之玉玦生不足以成名兮死為厲鬼以  
害賊耳一死兮頸血淋漓妻妾子女兮相從如歸傷  
舒州之士民兮爭捐軀而授首其人可以義化兮而  
不可以利誘人有生而必死兮死有輕於鴻毛惟精  
忠於大節兮與秦華而相高彼睢陽之小邑兮附巡

遠而名彰舒州之大藩兮抑千古而流芳挹夫子之  
貌兮溫其如玉臨大節而不可以奪兮秋霜之肅聆  
夫子之言兮穆如清風遇大事而果斷兮鏘然劍鋒  
友龍逢於地下兮驅國殤於淮陰痛姦諛之悞國兮  
甘俛首而包羞紛荃蕙之化茅兮胡犬豕之不若雖  
徼倖以苟活兮曷若死之為樂彼蒼者天兮胡然昏  
蒙成虧通塞兮舉失其中何虧者不可以成兮而塞  
者不復通觀夫子之志暫若虧塞兮垂清風於萬古  
欲買絲而繡其像兮且沽酒以澆舒州之士潛山兮  
蒼蒼淮水兮泱泱仰夫子之風兮山高水長

祭文

於乎公之生也翰林省郎憲臺紀綱道德政事行義  
文章公之死也忠貞之表邦家之光臣民之式人道  
之常孤城七年敵摧守堅狂濤蕩瀆砥柱屹然風節  
之存日星之耀張許睢陽先後相照生不虛生死不  
徒死先民之言惟公是似同安之山重岡疊岌突兀  
雲端偉然儀觀同安之水瀉瀉從從涵清流泚淵然  
德美澤被一方風高流長民思無疆曷云其亡某自  
愧匪材命承師旅鎮禦是邦叨公休祉穹城深池惟  
公之思風雨慘悽公其來歸昔在金斗年少蒙矜盛  
德溫言循循誨誘耿耿于懷恒焉孔悲敬奠一觴公

其鑒之

楊平章環

於乎洪濤蕩瀆砥柱屹立雪霜摧烈喬松茂鬱公之  
忠貞皎如日星俾後之人是式是承天道之常人倫  
之綱泰山北斗峻極光芒公之蚤歲茂登甲科闈臺  
栢府其政伊何秋霜之烈春陽之和令聞令望內外  
喧歌惟公之學聖賢堂室義軒周孔是究是習惟公  
之文雲漢天章于經于史賈馬班楊四方靡寧塵驚  
波揚公闡帥閩鎮于大邦率民以義身先戎行孤城  
自守不撓以康七年之中信孚政舉人弗予欺敵弗  
予侮在昔張許守厥睢陽勳烈赫奕昭于有唐迄死

不變千古弥彰公平同安先後有光愧我不材時焉  
何補奉

國之命來守茲土疆場其寧全民之生爰浚厥隍爰  
新厥城惟公神靈永保吉真清酒蔬肴是用假享公  
其有知來燕來享

錢性士復天台人本府知府

國之盛衰氣運所關惟公之心義則不然務挾妖氛  
幹旋元氣泰山可拔志不可移豈以衰微少虧忠義  
以經世之文仗匡運之武奉

命丞節守此淮土募兵於農戈戟田器樹柵為城剪  
衮為幟我眾既寡彼攻斯急東奔西馳食不假給我

敵既藏軍氣日銳來者俘馘退者喙息既避我鋒効  
義日至匡復之功屈指而計柰何豺豕千億鷹揚孤  
贅六年鏖戰不已羸壯五千扶傷日幾城孤援絕糧  
餉不繼雀鼠盡羅難充朝飢愛妾未殺淵沉其軀士  
有死心卒無生意潰圍匪難義不可去國步斯窘遂  
不可支彼蒼者天將心其隙

大明麗天旌忠斯棘安靈以祠牲牢歲祀於萬斯年  
名垂青史嗟予小子忠孝未裔來守是邦得瞻眉宇  
是感是悼薄陳樽俎靈其來享以慰景慕

劉昂 彦昂

疾風草勁板蕩忠臣翳元之季橫流四衝秦失其鹿

素雲夜哭大厦之傾支匪一木惟公鷹揚拯其頽細  
義同田橫忠鉄睢陽闔宅捐軀與城俱亡大星墮地  
箕弘之碧昭若星漢烈於金石古舒之濱斷碑嶙峋  
隧草黯翠夜臺壘雲仰茲令德載瞻載式攬悲蘭皋  
胥淚松砌嗚呼哀哉

跋

林士敏

甫人淮安知府

士敏曾見青陽先生文僅得一二篇如古人壘洗寶  
愛曾不敢褻玩近維揚張仲綱氏裒為命集讀之不  
忍釋卷但匆匆間不能措一詞以見少時景慕先生  
之意并仲綱裒輯之用心也

恩亭記

感

恩亭記

一飯之德一金之惠人皆知感之者矣至於天地之

覆載父母之生育人顧不知感者何哉彼其恩至大

而人視以為常也視以為常則不知感不知感則不

知報稱之道矣若夫兼天地父母之責而人受罔極

之恩者其惟君乎有天地以覆載也非君定禍亂寧

天下吾身其安得乎有父母以生育也非君制田里

教樹畜吾身其得終乎况夫食君之祿僭君之爵者

其感恩又非凡氓比也然不觀諸死難之臣則亦有

無自而知之者矣霜雪之摧條剥根然後知春陽之  
和煦也孽子之操慮深遠然後知驕兒之愛養也安  
慶府正觀門之西故有余忠宣公墓墓東有巔特聳  
拔俯瞰大江匹練千里民舍縱橫歷歷可指數迤里  
隔岸遠近諸峯亦蒼翠朝夕異觀旁有古松一  
株可兩人抱上作偃蓋形江風鼓之與波濤聲相應  
蒼班荆其下無日光塵土氣城中外諸山景鮮與比  
肩者吾同寅二守岳陽顏君祿壽天被作亭其上肇  
工於弘治癸亥仲秋不越月而工畢招余與判府喬  
君瓛廷信推府沈君珪廷瑞落成焉予名為感恩亭  
而謂之曰當夫勝國之失馭也四海分崩群雄

崛起爭城畧地斬艾人命曾不草菅若積屍成阜流  
血成川而安慶介於湖湘江淮間在所必爭之地于  
時陳友諒寔強張士誠次之其他盜名號據土地者  
不可殫述忠宣公承詔命起家來與韓公建同守此  
城六七年間大小血戰凡幾百卒之援絕糧竭遂父子  
夫婦一門皆死於忠未幾我

太祖高皇帝殪友諒擒士誠四方群雄以次就縛授  
首天下始定于一

列聖重華繼明昭百四十年間養與教兼至雖鷄犬  
魚鳥猶勝於亂離之士庶此與夫一飯之德一金之  
惠其小大何如也夫聞節詔則思舜德觀河洛則思

禹功異代且然今吾與子咸享朝家之爵祿從容從事一堂之上秉政務之餘暇得以玩山水閱帆檣於尊俎間畢竟罄歡於一日非我神祖與

列聖之恩其得尔邪使忠宣遭此時也必將封爵績享榮名以終世奚有清水塘之難邪夫死節固臣子所自靖然亦豈願為此邪用是言之則我國家之恩合天地父母為一而凡登是亭者其可以不知感邪感之云何盖自一命以上皆思殫厥心力盡厥職守以無負

上之所任用不幸而見危授命與古之列臣義士方駕而爭先斯其知所謂感恩者矣夫然則天被之建斯亭也豈徒以遠眺望實遊樂而已者哉予與顏君又各為屋十四楹於景忠樓之東西使道士曰汪山蘭居之以時奉祀且以舍過客因併記之

直隸安慶府知府四明楊茂元撰

本府貳守岳陽顏公嘗慕忠宣公之為人也乃

於墓側建一小亭每公事之餘或迎送之便必於是憩焉郡主四明楊公乃為記其巔末發其意而標曰感恩者盖謂人臣之受恩於君時勢不同常變或異而理則無間也報之者或能決死生於危迫之際未免計豐約於晏安之時故欲因其死者感吾之生使

生者無愧於其死思其變者儆吾之常俾常者無忝於其變斯為知所感而能報者矣公之心何盛哉若夫來游君子玩斯亭也感斯意也亦以公之心為心隨事効忠不以生死而有異志因時盡職不以常變而有異心則不徒羨人而甘自棄矣斯亭之建其有功於世教也豈尋尺者哉故脩錄其記別為一卷連於集後以為觀者之勸云

安慶府學訓導黃岩汪齡謹識

重編青陽附錄後序

青陽附錄乃寰中士大夫景慕余忠宣公之高風大節見諸吟咏述作而慨悼敷揚追挽於沒世之下寔維揚張仲剛氏採集而成編者也自是厥後凡詞人墨客經謁祠墓暨玉著衣冠而倡和賡續之者亦頗多什先是與先生本錄混為一編前守徐君民望別置附錄自為一集但其間類列參錯弗次我貳守岳陽顏侯覽而病之命郡庠司訓汪齡衷而析之其死節本末元史節要并元人傳記書劄仍居首簡自餘始七言絕句次五言律詩次五言排律四言五言七言古詩長短句次之謠行詞調祭文題記又次之編

既成矣復虞字義舛謬疵冗交襍乃屬忠為之校正  
忠乘暇展閱數過其間若持掎朽朽鈇鈇之近似者  
改而易之巾襟帥率亟殛之差誤者釐而正之間者  
語意蹈襲前人畧無變態而嫌于屋下架屋者削去  
之或二三首出自一人而工拙殊製者存其尤而其  
次則刪之若此者悉遵侯之命意是故考証去取播  
颺淘汰者數四庶幾訛舛訂而義意明繁簡適中而  
不傷於濫斲也若昔成戎角角之不分魚目驪珠之  
不辨則無之矣用是進呈侯所侯閱而領之曰予之  
校正者近是矣忠重惟侯之倅是郡也其宅心操行  
好士愛民剴繁治劇敏捷冰能政譽籍籍在人口碑

不容復啄至於嘉薦忠貞好古文學雖則職務紛縷  
而未嘗不加之意焉侯於弘治辛酉歲下車即政臨  
民之初首謁先生靈墓於正觀門外之西時景忠樓  
之四隅陵隋境嶽荆莽叢翳侯乃與役鑿平剪薙界  
址奠方與主土者協謀建屋十四楹於樓之東西命  
羽士汪山蘭責專典守用供馨薦又豎仰高感恩二  
亭於墓之東畔以備遠眺而仰止景行感

恩圖禋之意實寓於其間侯之意以寢廟增脩固足  
以聳人之瞻仰而載籍整飭尤足以感人之心思而  
是編之品析校正有由然也豈彼尋常集烟花荒唐  
怪誕之說徒沽好事之名無補于風教者所可同日



而語哉齡承命於其始忠愛託於其中而疾復錄梓  
于終以溥其傳則先生之高風大節將與天地相為  
悠久無疆而仲劄創編與徐君別錄之志俱於是乎  
卒矣忠不愧譙陋而踐序於末簡俾後之君子嗣而  
葺之者知所本云時

正德貳年龍集丁卯建未月哉生明日

賜進士陝西按察司副使致仕進階三品太中大夫  
前監察御史皖城柯忠拜手謹書

農民嚴時茂寫

錫麒少時習觀元史至陳賊攻皖城陷余左丞遜同  
宣公死之未嘗不高公之節義而悲時敵之頃向以  
徒抱景仰耳丙申歲承乏此邦司刑既至首謁公之  
祠登公之塚長江泛恨芳草含冤惕然為之動慨心  
猶歎以未覩公之掣集為也越翌祀夏適寧國鄧貳  
守兩峰公入于皖授以公青陽文集二帙予欣然受  
之縱觀之達旦弗克釋寤作而嘆曰神會者與目遇  
有間目遇者今自我也神會者昔自我也公之英爽  
遐矣弗可即公之遺即公之遇也目遇之切者所以  
驗其神會者之尤至也雖然太上立德其次立功立  
言皆謂之不朽公之節義揭揭乎其昭宇宙而不可

掩也錚錚乎其貫金石而弗可渝也尚矣故其發於  
文也贍而典潤而章質而不俚簡而不鄙斯人之所  
以愛而傳久而彌光遠而彌昌也間訪諸古皖士人  
則以為公之正集青陽前守海岱張中丞公刻之矣  
而弗存百世之下慕頌之而見於贊述稱咏者維揚  
張仲副氏採而成編附刻之而復傷於殘缺予病夫  
觀者之難悉公之全集也公暇取二集校閱正集釐  
為四卷又以附刻之二卷續諸後繡梓以行庶夫公  
華國之英垂世之美而後人好德之私贊述之富一  
覽無遺矣予素謏陋以刻成不可無識之以歲月遂  
弗敢固辭

嘉靖戊戌夏六月之吉閩長樂鄭錫麒謹識

國史館藏



